



## INATSISARTUNI

Partii Inuit  
Randi Broberg

UPA 2014/48-1  
15.5.2014

**PILLUGU: Innuttaasuni utoqqaat amerligaluttuinnarnerat eqqarsaatigalugu utoqqarnik isumassuinitinnut ilaatillugu utoqqarnut ininik neqerooruteqartarnerput siumut sammisooqqullugulu ullutsinnut naleqquttooqqullugu utoqqarnut inissianut tunngatillugu suliassaqarfimmi pilersaarusiornissamik Naalakkersuisut peqquneqar-nissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Aqqaluaq B. Egede, Inuit Ataqatigiit)

Partii Inuit paasinninnerput aallaavigalugu, siunnersuutikkut ujartorneqarpoq utoqqartatsinnut isumalimmik atugassaqaartitsinissaq.

Maluginiarparput siunnersuummi pineqarmat utoqqaat qallikkut/ineqarnikkut atugaasa pitsanngorsaaviginerinut atasumik, ilukkut pissarsiviusumik/isumalimmik utoqqartatta atugassaqaartinnissaat pingaartinneqartoq.

Naalakkersuisut akissuteqaataanni erserpoq, ukioq 2014'ip ingerlanerani utoqqartagut ataatsimut isigalugit pilersaarusiorneq naammassisussatut takorlooraat.

Taamalu siunnersuutikkut ujartorneqartoq aallartinneqareermat, siunnersuut itigartitsissutigineqassasoq.

Partii Inuit tamanna pissusissamisoortutut pisarialittullu isigaarput. Qilanaarivarpullu nalunaarusiassaq taakkartorneqartoq aallaavigalugu, sukumiinerusumik ataatsimullu isiginninnerusumik, utoqqartatta atugaat pillugit eqqartuisoqarnissaa.

Naggasiullugu Partii Inuit immikkut oqaaseqarfigerusutarput tikilaassavarput:

Tassalu utoqqartatta ilukkut pissarsiviusumik isumalimmillu atugaqarnerinut tunngasoq. Nalunngilarput qallikkut ilorlikkullu atukkagut qanorlu misigisimanigut imminnut ataqatigiittut avissaartitassaanatik.

Taamaattumik Partii Inuit qamanna pisumik kaammattuutigissavarput, utoqqartagut ataatsimut isigalugit pilersaarusiornermut atasumik naliliivigineqartariaqartoq, utoqqartatta pisinnaasut soqutiginnittullu assigiinngitsutigut kivitseqataasinnaanerat.

Assersuutigalugu piorsarsimassutsikkut pigisatta kinguaariinni tullernut ingerlateqqinneqartarneri eqqarsaatigalugit, atuarfimmi pingaartumik minnernut immersueqataasinnaanerat pingaaruteqarpoq aqutissiuunneqartariaqarlunilu.

Taasassaqqippat assassornermut tunngasut, pinngortitamik atuinermut tunngasut il. il.



INATSISARTUNI

Partii Inuit taama oqaaseqarluta qujavugut.